

tajemmat n-umsiggel d-bubker

zrin-iyren d-isegg^wasn. luhn dâr-umsiggel t-tamment iferħan t-tferħin. yan-wass yuška-d dârs ayt-zzawit bubker, iga t̄taleb imeqqurn ġ-temdint. insallam-dids-umsiggel s-lefrāħ, iššekšem-t s-tgemmi yini-as: «a-si-bubker, nesfeld izd argaz ifulkin a-tġit, trit bedda a-teskârt ma-irđan rbbi.» yini-as bubker: «a-issegzif rbbi lēamr-nnek ay-amsiggel. ula nkk^wni nesfeld fellawn izd mġiddn fulkinin a-tgam, ar-teskârm lħir i-kraygatt yan.» izayd bubker yini-as: «šamħ-iyi ay-amsiggel, riġ a-k-seqsaġ f-ma-s-tumnem ula mamnek a-teābadm rbbi.» yini-as-umsiggel: «šukran a-si-bubker. ra-yk-iniġ f-mad-ssneġ.»

gawrn ilemma, tawi-asn-d tamment atay. yasi bubker lkas-ns yini: «bismillah.» yini-umsiggel ula nttan: «bismillah.» ifrāħ bubker isu, yini-as: «ifulki-watay n-tmazirt-ad. zriġ-k tnnit bismillah zund nkk^wni.» yini-as-umsiggel: «wa-si-bubker, s-ism n-sidi rbbi a-s-a-neskâr kullši. mra-ys-ur-aġ-itēawan nttan, ur-ra-niżđar i-yat. ašku nttan a-yġ-yakkan ššaħt ula lēaqł ula kullu ma-dârneġ-illan.» ifrāħ bubker s-wawal-ad. zaydn jmāen i-ngratsen f-teħkimt n-rbbi ula leħnant-ns.

iđaleb-as ilemma bubker: «ini-yyi a-g^wma amsiggel, mamnek a-ttżallam?» yini-as-umsiggel: «tażallit-nneġ tga ġemka. illa f-yan a-ijjujad iħf-ns, yissan is-ra-isawal d-walli iħelqen igenwan d-wakal. ma-tswangemt a-si-bubker, ma-gisn-išqan nize a-nsird ifassen-nneġ niġd a-nsird ul-nneġ?» imnad gis bubker yini-as: «ul-nneġ a-išqan.» yini-as-umsiggel: «nkk^wni, akud nna-nra a-nzżall i-rbbi da-zwâr-nsiggil ġ-uwl-nneġ a-nissan is-ġinneġ-illa kra isšheššamn. nzżall ilemma s-ism l-lmasiħ lli-d-yuška a-yġ-issġus zġ-kullu ma-y^wħšenn.»

iseqsa-t: «izd s-taġrabt a-s-a-ttżallam?» yini-as: «rbbi issen i-kullu iwaliwen, ifhem kraygatt lluġa. ar-dids-nsawal s-tšelħayt.» iseqsa-t: «ma-ttinim ġ-tżallit-nnun?» yini-as: «ar-nteħmad rbbi, ašku nttan a-iħelqen ddunit ula kullu ma-gis-illan. ar-t-ntškar f-rrħämt-ns ula leħnant-ns ula f-kullu ma-yġ-iskâr ifulki ġ-kraygatt ass. nđaleb zġ-gis a-yġ-iguwwed, issdus-aġ ġ-uġaras n-ufulki. nzayd ilemma nđaleb-as f-aynna-yaġ-iħeššan ula f-ssibt n-wadjarn-nneġ nna-iheršen. nđaleb-as a-ibarek ġ-imeddukk^wal-nneġ ula inuwwašn-nneġ.»

yini-as bubker: «ifulki kullu mayad ay-amsiggel. is-trit a-yyi-tmelt iwaliwen ma-s-a-ttżallam?» yini-as: «yan-wass illa lmasiħ ġ-yan-udġar, đalben-as imħđarn-ns: «ml-aġ mamnek a-ntżalla.» yini-asn «tżallayt ġemkad, tinim i-rbbi: wa-babatnneġ lli-illan ġ-igenna, a-yili luqr i-ism-nnek, tašk-id-tgeldit-nnek, yili ma-k-irđan ġ-ddunit ġemkelli illa ġ-igenna. fk-aġ-d ġassad aġrum lli-neħtajja i-wass-ad, tšameħt-aġ f-lħ^wšant lli-nesker, ġemkelli nšameħ nkk^wni i-willi ġinneġ iskern lħ^wšant. tssanft fellanneġ kullu ma-ra-yġ-n-ildin a-nesker ma-y^wħšenn, tġjenjemt-aġ zġ-iblis.» » lliġ ikemmel-umsiggel awal-ad, yall bubker alln-ns s-igenna yini: «amin a-sidi rbbi, amin a-sidi rbbi.»

iseqsa-t-daġ bubker: «mennawt-twal a-ttżallam ġ-wass?» yini-as: «ur-fellatyawfrađnt tasaēin a-bubker, walayenni ġakud nna-yġ-iēājben. ar-nteħmad rbbi ġakud nna-d-nenker zikk šbaħ. d-ġakud nna-di-tters lmunt ar-t-ntškar f-lbaraka-yan. ar-tżallaġ t-tarwa-nu ur-ta-ilkim kud yan tawuri-ns. da-tżallaġ ġ-uġaras ula ġ-dâr-twuri. ar-tżallaġ daġ d-imeddukk^wal-inu nna-d-dâri-yuška. da-tżallaġ ula t-temġart-inu ur-ta-ġinġ.»

iēawd-daġ iseqsa-t bubker: «is-kullu-munn ayt-uduwwar-nnun d-uġaras-ad a-g^wma? is-a-kullu-skârn zund kunni?» yini-as-umsiggel: «illa ma-yumžen aġaras-ad, yili ma-yumžen iġarasn yađni. illa-uwday yāequb bn-išħaq ar-itżalla tażallit-ns, yili-waerab si-moħammed ššrif ula nttan ar-itżalla tażallit-ns, ilin wiyyađ.» iseqsa-t bubker: «is-ur-tlli tażit ġ-ingratun?» ar-iđšša-umsiggel yini-as: «uhu, ašku aytmatn a-nga. nešker-t i-rbbi, nezdeġ kullwaġ s-sslamt ġ-ingratnneġ. ar-aġ-tuqqarn ar-tn-ntuqqar, ar-aġ-tēawann, ar-tn-nēawann.» iseqsa-t: «imma tarwa-nnun t-tarwa-nsen, is-ur-a-temmaġn i-ngratsen?» yini-as-umsiggel: «uhu, ar-kullu-teħđarn ar-tlēabn ar-tefraħn i-ngratsen.» iseqsa-t bubker: «is-ur-d-iqqan mġiddn ad-kullu-gen yan baš a-ur-tili tażit ġ-ingratsen?» yini-as-umsiggel: «zer iġdađ ar-gerrun ġ-igran. kra gisn ar-itazzal, kra ar-itak^wi, walayenni ur-a-tzin

f-mamnek a-d-iqqan yan a-ifettu. ar-kullu-zeddeġn s-sslant ġ-ingratsen. iġ-illa luqr ula liħtiram i-ngratneġ, ra-kullu-nezdeġ ġ-lehna.»

yini-as bubker: «tbarek allah elik ay-amsiggel. šamħ-iyi, iġ-ra-k-seqsaġ f-yat-tġawsa yaħni.» yini-as: «ur-gis bas a-si-bubker, zayd tseqsat-iyi.» yini-as: «ar-ttinin kra n-miħddn nis-tbeddlem linjil lli-d-yiwi lmasiħ.» imnad-gis-umsiggel yini-as: «ma-yk-ibann a-si-bubker? imħdarn nna-illan d-kra n-nnabi, nis-rad-iħdarn ad-beddln awal-ns s-kra n-wawal yaħni? nis-ur-rad-dârsen-eħzzan iwaliwen n-nnabi-an ugg^wâr n-tudert-nsen? aħku lamant-an, ifel-tt f-umggerd-nsen. inna lmasiħ s-iħf-ns «rad-ittin igenwan d-wakal walayenni ur-sâr-ittin iwaliwen-inu». ġ-uwssan lli-ġ-illa lmasiħ ġ-ddunit-ad, ar-itekka kraygatt mani ar-iskâr lħir. ar-dârs-ttaškin miħddn ggutnin ġ-uwssan-an, žern ma-iskâr sfeldn i-ma-ittini. is-rad-iħdarn ad-kullu-ttun awal-ns d-isekkirn-ns? nis-rad-qbeln kra n-wawal ur-igin awal lli-mi-dârs-sfeldn?» yini-as bubker: «uhu, ur-ra-t-qbeln.» izayd-umsiggel yini-as: «ġakud lliġ ityara linjil l-lmasiħ, ilkem kullu tisgiw n-ddunit. mra-ys-nnit-ran ad-beddln awal-ns, is-rad-iħdarn ad-beddln ġ-kraygatt mani ma-ityaran ġ-lektub-an, ssengaddan-tn, rarn-tn ad-d-kullu-mšaškan ġ-ddunit kullutt?» yini-as: «uhu, ur-rad-iħdarn i-mayan.» yini-as-umsiggel: «a-si-bubker, linjil-ad dârneġ illan, linjil iħšan a-iga. ur-jji-itbeddl. aħku rbbi a-t-igabeln, ur-yudji miħddn ad-ssinifn awal lli-f-tn-yuħša.»

yini-as bubker: «lliġ ġriġ nkki ttariħ n-tmazirt-nneġ, teħjbeġ ġ-mamnek ad-skârn imasiħiyn imzwura f-sslant. ur-a-tasin ssif ula da-temmaġn d-miħddn yaħni. ur-a-ttirin ad-nrun wiyyaħd ula da-tn-trâran s-ifaddn. ar-ġir-sawaln d-miħddn f-uġaras l-lmasiħ, ar-tn-teawann ġ-išabukn n-kraygatt ass, aylliġ ilkem-wawal-nsen ddunit kullutt.» yini-as-umsiggel: «t^wġzant a-si-bubker. lmasiħ ur-jji-yusi ssif ula issenker imiġ. sslant a-f-yuħša imħdarn-ns, yazn-tn ilemma ad-eħmmren ddunit s-leħnant n-igenna. aħku linjil, tga lemeħna-ns «leħbar ifulkin», ar-aġ-imala mamnek a-neskâr afulki i-kullu miħddn s-lefrâħ izgan idumn.»

yini-as bubker: «illa dâri yan-useqsi yaħni. willi umennin s-lmasiħ, maħ aylliġ a-ys-ttinin yus n-rbbi? ma-tga lmeħna n-wawal-ad, aħku rbbi ur-a-itetahal ula da-itaru?» yini-as-umsiggel: «illa dârk lħăqq a-g^wma bubker. rbbi ur-igi zund bnadm, ur-a-itetahal ula da-itaru. lemeħna-yad urd ġemkelli-stti-teqsaħt kiyi a-tga. is-tssent mamnek a-d-ilul lmasiħ?» «nssen-t kullwaġ.» «yuzn-d rbbi lmalak jibrayyil s-yat-tefruħt ism-ns maryam. yini-as lmalak «hati ra-terbut, tarut yan-warrow.» tini-as maryam i-lmalak «mamnek a-ra-yyi-yili mayad? ur-dâri argaz.» yini-as: «ra-d-fellam-igguz rruħ n-rbbi, tdl-km-teħkimt n-rbbi. mayad a-f-ra-nttini i-warrow-an amzlay lli-ra-tarut «yus n-rbbi.» » yini-as bubker: «iħša-wawal-ad. nssen iz-d-ilul lmasiħ zġ-rruħ n-rbbi ula taħkimt-ns. ur-yaggug-wawal-ad f-walli dârneġ illan.»

yini-as-umsiggel: «imma yan-d-iluln zġ-waħlig n-teħyyalt bla argaz, ur-ra-ig zund miħddn yaħni.» yini-as bubker: «nssen is-isker lmasiħ lemeħjizat ugg^wâr l-lanbya yaħni.» yini-as-umsiggel: «ššaħt ayd tnnit a-g^wma bubker. aħku ar-dârs-ttisfiwen ibukaħn, ar-fettun ikušamn, ar-tġusn injdamn, ar-sefliġn iħerħar, ar-d-nkkern willi mmutnin. umenn sers miħddn ggutnin, aħku tban gis lbaraka n-rbbi ugg^wâr n-kullu lanbya lli-zrinin. kullu mayan, iħdar-as aħku ur-igi zund nkk^wni. ddat-ns tga ddat n-bnadm, walayenni rruħ lli-gis-illan, iga-t rruħ lli-d-fellas-igguzn ġ-udis n-innas. ssift-ns tga ssift n-urgaz, walayenni taħkimt lli-gis-illan tga-tt-teħkimt n-igenna.»

izayd-umsiggel yini-as: «mayan a-f-ur-jji-iskir lmasiħ kra y^wħšenn ula kra iħibn.» yini-as bubker: «nssen izd lanbya kullutn ar-tħalabn rbbi a-ysn-iġfer ġemkelli zġ-gis ntħalab nkk^wni.» yini-as-umsiggel: «t^wġzant a-bubker, yan gisn iħdaleb rbbi a-ys-iġfer seħein-twal. imma lmasiħ, ur-jji-iħdaleb a-ys-iġfer ħetta yat-twal. yan-wass iseħsa miħddn «manwa gigun a-fella-izzgan kra n-ddnb?» fessan ntni, ur-dârsen ma-ttinin. yan-wass yaħni fkan fellas tugg^wa-yad «ur-jji-iskir kra n-ddnb.» kullu mayad imla-yaġ nis-ur-igi nttan zund miħddn yaħni.» yini-as bubker: «fhemġ ġilad maħ aylliġ a-ys-ttinim yus n-rbbi. amzwaru aħku ilul-d zġ-rruħ n-rbbi, tis snat aħku tlla-gis-teħkimt n-rbbi.» yini-as-umsiggel: «t^wġzant a-g^wma bubker, walayenni tlla sur tis kraħt. aħku ifka-yas rbbi a-isker kra mi ur-ħdarn lanbya. yuzn-d walli-ġ-ur-illi lħib a-yasi lħib n-wiyyaħd. yuzn-d walli-f-ur-illi lħukm l-lmut a-immet ġ-leblašt-nneġ nkk^wni.»

iswagem bubker, yini ilemma: «fhemġ ma-ttnit ay-amsiggel, walayenni kra ginneġ ar-ittini ur-immut lmasiħ. ġaln-uwdayn is-t-nġan walayenni iġa kra n-yan yađni.» yini-as-umsiggel: «šamħ-iyi a-g^wma bubker, a-yk-melġ ma-inna lmasiħ, ur-ta-t-umżn-uwdayn. inna «ra-nddu s-temdint n-urušalim. ra-yyi-n-dħin s-gr ifassen n-inmġurn n-uwdayn. rad-fella-ħkamn s-lmut. ra-gigi-teṭnażn ssufsn fella leħđn-iyi nġen-iyi. walayenni ġ-wis krađ-uwssan rad-d-nekreġ zġ-lmut.» issen lmasiħ ma-ra-ys-ijru, inna-yasn awal-ad kraṭṭ-twal afad a-ur-t-ttun. lliġ-d-mšaškan-uwdayn d-rruman a-t-nġen, issann kullu nizd yus n-maryam a-iġa. lliġ-t-nġan, tbidd innas d-aytmas d-imħđarn-ns ġ-tama-ns. nttni ssenn bahra nizd nttan a-iġa. lliġ-d-inker zġ-lmut isawl didsen, išš didsen, iml-asn timitâr lli-feln imsmârn ġ-ifassen-ns d-iđarn-ns. mamnek a-ra-ibidd yan ġ-lg^wddam n-innas d-aytmas d-imeddukk^wal-ns bla-t-uk^wzn?»

yini-as bubker: «walayenni is-ra-yadj rbbi yan iġan nnabi a-immut zund yan yuk^wrn niġd yan inġan rruħ?» yini-as-umsiggel: «rbbi a-iqšadn mayan zġ-isizwur a-g^wma. ityara-nnit kullu mayad ġ-warratn l-lanbya n-zman, imla-ysn rbbi nis-ra-immut lmasiħ. ašku ira a-isker s-idammen l-lmasiħ yal-leăhd l-lejdid ġ-gras d-bnadm. d-lmut-ns a-s-yusi lmasiħ lħukm lli-illan f-ddunit. izri nttan ġ-leădab l-leqber afad a-ur-zġ-gis-nzri nkk^wni. inna nttan «lħăqq ayad, lħăqq a-rad-awn-iniġ. iġ-ur-iđer-waqqa n-irdn ġ-wakal immt, waħdut a-ra-iqama. walayenni iġ-immut ra-d-yawi ššabt iggutn.» ur-iqama waħdut nttan, ašku inker-d ġ-wis krađ-uwssan ġemkelli-s-inna i-imħđarn-ns. yall-t ilemma rbbi s-igenna, ar isigg^wra n-ddunit ra-d-iwerri. ra-issmun kullu willi sers umennin, yawi-tn dids s-tudert idumn, tili-as ššabt iggutn.

izayd-umsiggel yini-as: «wa-g^wma, ra-yk-iniġ yat lmaġena. iġ-işuđ-wađu itjehhedn, da-issuguf tuga iqqurn f-uwdm n-wakal. ha-iwaliwen l-lanbya zund ađu ad-gan, ar-ssittin ljhalt zġ-bnadm. imma akal, urd ađu ka-iħtajja ma-issugufn tuga iqqurn. iħtajja ula anzar ma-d-issemġayn tuga l-lejdid. ha-bnadm, urd lanbya ka-iħtajja ma-d-itawin luşiyat ula lefrayed. iħtajja ula ma-t-iteămmarn s-lbaraka n-igenna ula lquwwa n-rbbi. imla-yaġ lmasiħ is-izđar a-yġ-iskâr kullu mayad. ifka-yaġ a-neămmer s-rruħ n-igenna ma-yġ-iteawann ġ-kraygatt luqt. hati rruħ-ns a-yġ-ideħħin ar-aġ-issdus ar-aġ-issfrah. ar-aġ-iteămmar s-teħkimt-ns ula leħnant-ns, ar-aġ-itguwwad ġ-kullu ma-neskâr. ar-t-ntškar bahra f-lbaraka-yad-aġ-ifka.»

iswagem bubker yini-as ilemma: «šukran ay-amsiggel. ur-riġ ad-geġ zġ-ġwilli itđadđan kra ur-fhimn. ssneġ ġilad mamnek a-iġa liman-nnun. mra-ys-a-seqsan mġiddn, ur-ra-fellawn-ttinin iwaliwen hwanin.» yini-as-umsiggel: «frăħġ bahra a-si-bubker s-ššber d-lemħabba lli-illan ġ-gratnneġ. nzzri luqt ifulkin.» inker bubker, iħebbel-d amsiggel insallam dids. imun-dids-umsiggel ar ššonġi. iwerri-d ilemma s-tgemmi, iġer-d i-tamment ad-zzalln đalben rbbi a-ibarek ameddakk^wl-nsen ayt-zzawit bubker.